



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Polish tir election nung Karol Nawrocki-i takok angu

Maxwell ODI asaya nungi anisüngzüker



VOL. XXII ISSUE NO. 229 (ADOK 229)

DIMAPUR

SANGTENNÜ (TUESDAY)

AAMI (JUNE) 03, 2025

₹ 5.00

ILP atema police-i senchi meshitsü makok

Dimapur, June 2, 2025 (TYO): Nagaland Police-i mapang shia Inner Line Permit (ILP) mita reprangtsü saka ILP mesüra kulikaket tejangia malir dang police-i senchi meshitsü tashi mali.

ILP alema inyakertem dak senchi achitsü atema magistrates nem dang tashi agüja lir ta Nagaland Police-i tanü sangdong ka nung metetdaksüogo.

ILP application (<https://ilp.nagaland.gov.in/>) ya online-only system ka ama yangluogo aser December 31, 2024 nungi offline applications magir.

Nagaland semdangi aruba domestic tourists temi Rs 200 agütsür 30-day permit angutsü akok. Kasa mapang atema foreign tourists dang Rs 300 agir.

Maneni, shishilembartemi Rs 300 agütsür 90-day permit atema angutsü akok aser iba atema Rs 150 renewal fee agitsü. Shishilembartemisa Rs 1,000 den Rs 500 renewal agütsür annual

permit angutsü akok.

Ano, aayangertem nem Rs 150 agi 90-day permit agütsür aser iba atema renewable fee Rs 100 lir. Technical personnel aser consultants-i Rs 1,500 agütsür 2-year permit angutsü akok aser uiba atema renewal fee Rs 500 lir.

Putirtem aser tesayurtemi Rs 1,500 agütsür 3-year permit angutsü aser iba atema renewal fee Rs 500 lir. Kaketshirtemi Rs 300 agütsür küm 5 mesüra parnok course kümsük atema permit angutsü.

Tatamsa business partners-i Rs 5000 agütsür 3-year permit angutsü aser iba atema one-time renewal fee Rs 3,000 agitsü.

Nagaland nung ILP angutsü atema Aadhaar card, educational certificates, business registration proofs, aser nisung kar atemabo local guarantor nüngdaksü. Ajisüaka, kaketshirtem aser foreign tourists atema guarantor menügdaksü.

CP Dimapur-i traffic osang metetdaksür

Dimapur, June 2, 2025 (TYO): Kohima nungi Mao National Highway-02 nung Phesama anasa lenmang anenzüka ogo aser iba ajanga iba tesem nung highway ajunga shibanga lir.

Anungji tanga tetuyuba ka magütsü tashi Manipur leni aoba truck gari tulutem (not more than 6 (six) wheels) Chathe Bridge (Patkai Junction) adena meyoktsü ta Commissioner of Police, Dimapur-i

metetdaksüogo.

Chathe Bridge aser Kohima tsüngda lenmang nung traffic ajema akümtsü aser public nem timtem magütsütsü atema iba tenokdangba agütsür ta pai ashi.

Tanga tetuyuba ka magütsü tashi iba tenokdangba alitsü anungji transporters, commercial vehicle operators aser public-i tashi angaa anidaksü mepishir ta Commissioner of Police-isa metetdaksü.

NFHRCC-i Longleng Division sema senzü



Dimapur, June 2, 2025 (TYO): Nagaland Foothills Road Coordination Committee (NFHRCC)-i asen state telongtet nung Nagaland Survival Road ka yanglutsü tenangzüka nung inyaka arur aser June 2, 2025 nü Longleng Division nung Foothills Road yangluba sema senzüogo.

Tanü NFHRCC den külemi NPWD[R&B], Contractor firm aser local Villages Council züngsemtemi lenmang yangluba reprangdanga senzü.

Longleng Division nung single lane maintenance work ya Contractor firm M/S A. Pongshi Phom & Sons ajanga Rs 1,46,31,280 lemozüka inyaker. Bangdak Department-i DPR nung lateta aliba ama mapa inyakba nguogo ta Media Cell, NFHRCC-i sangdong ka nung ashi.

Tanü Longleng Division sema senzüba NFHRCC Team ya B. Tushah Phom lenisüba kübok Executive züngsem pezü dena liasü.

Nagaland sorkari IAS Selection nung tim masüba inyaker

Kohima, May 30, 2025 (TYO): Nagaland sorkari tim masüba inyakyim ajanga mapa nung aniokertem Indian Administrative Service (IAS) cadre nung züngsemtsü yaritepba atema tebilemtsü abenba metetdaksüogo.

Iba osang ya Confederation of All Nagaland State Service Employees' Association (CANSSEA), Federation of Nagaland State Engineering Service Association (FONSESA), Nagaland Secretariat Services Association (NSSA), aser Nagaland Finance & Accounts Services Association (NF&ASA) teloktemi ashi.

Government Circular ka nung non-State Civil Services (non-SCS) nungi IAS mapa tazüng ka atema eligible officers nungi applications meshi. Iba sangdong nung anogo 15 nü application window agütsü aser nisung 10-i tenüng agüja liasü.

Ajisüaka, submission deadline sülen anogo ka dang lir Circular ji

agian aser state sorkari eligibility criteria yanglushitsü lemtet. Iba ya AS (Recruitment) Rules, 1954 aser IAS (Appointment by Selection) Regulations, 1997 kübok inyaker ta ashi aser iba ya Nagaland Public Service Commission (NPSC) ajanga masü saka backdoor appointees anioktsü atema lir ta CANSSEA, FONSESA, NSSA aser NF&ASA teloktemi aitsür.

Sorkar ketdangsübaren nung tajungtiba shima inyaksü putu ka nung iba lemtet nung ashishitep adoker aser tim masü. Iba lemtet ajanga linük nung civil service tongtiba IAS nung tetoktepba mesüra merit-based recruitment melii inyakertem shimoktsü meranger ta parnokisa ashi.

IAS (Recruitment) Rules, 1954 aser IAS (Appointment by Selection) Regulations, 1997 ya ozüng alema mesüra tim mesüi nisungtem shimoktsü atema latetba masü. 2018 nung Nagaland Civil Service Association (NCSA)-i shidi ka

züluba sülen NPSC ajanga shimokertem nem dang IAS jenjang agütsütsü Circulars sangdongogo, ta parnokisa ashi.

Iba inyakyim sülen anidaksü melena sorkari nisung kar shimoktsü atema lemtet balaka agiogo. Yamai dang inyaka ora tarutsü nung tashishitsü keta sorkar mapa nung shima inyakertemi policy yangluba shilem tulu agitsüsa akümtsü ta parnoki tebilemtsü lemsatop.

CANSSEA, FONSESA, NSSA, aser NF&ASA ajanga aiben state sorkar dangi shidi zülüogo saka IAS (Recruitment) Rules, 1954 aser IAS (Appointment by Selection) Regulations, 1997 kübok mapa inyaka aotsü ta dang sorkar nungi telangzüba agütsür.

Ajisüaka item teloktemi eligibility norms aser merit-based selections akangshitsü atema shiditem zülüogo ta Media Cell, Core-Committee for Non-SCS IAS Induction-i sangdong ka nung ashi.

AKM-i nüburtem züngyanga alitsü metetdaksür

Mokokchung, June 2, 2025 (TYO): Tanü-asüng aser talisa Kohima aser Dimapur nung nisungtem pur aoba atalokba osang nüburtem, kaketshirtem, tsüraburtem, kaketriju-tem, lanur telok aser yimsüng nüburtem ajak kanga dang saksalema alitsüla ta ta AKM Tir Sp. Lanutoshi Aier aser Tongti Zülur Sp. Satemmongba nati sangdong

Mokokchung district ya

Assam den arrtsü süa lir aser iba den talisa inter-state aser inter-district den tesendaktep alinung nüburtem, kaketshirtem, tsüraburtem, kaketriju-tem, lanur telok aser yimsüng nüburtem ajak kanga dang saksalema alitsüla ta ta AKM Tir Sp. Lanutoshi Aier aser Tongti Zülur Sp. Satemmongba nati sangdong

ka nung ashi.

Temulung melemtetba nisung, gari aser mulung melemtettsüsa inyakba maparen kar danga lazükra anasatiba Police Station mesüra AKM office den +917005740523 / +918837486276 nung osang agütsüteptsü metetdaksür ta AKM mendenpurtemisa ashi.

Tanur den sendakba video meproksütsüla: DCPU

Dimapur, June 2, 2025 (TYO): Juvenile Justice (Care and Protection of Children) Act, 2015 ajanga tanurtem timtem nung mesüra ozüng alema inyaksangshiba indang video proksütsü memelar aser iba mapa inyakertem ozüng kübok temerenshi lir ta District Child Protection Unit (DCPU)-i metetdaksüogo.

"Tawa tu social media nung tanur ka dak tashiyim inyakba video ka kanga proksühiogo aser ibala video proksüha lemsaba ajanga tanur temulung talila yirutsü, maaksüa bilemtsü akok anungii nübortemi iba video meproksütsü ayongzüker" ta Child Protection Officer, DCPU Chümoukedima, Nikito Zhimomi-i ashi.

DCPU-isa senso aser media dang tanur dak sendakba tatalokba atema tebilemtsü bena inyaksangshitsü mepishia metetdaksüogo.

"Nenoki ibala video ngura online nung meproksütsü saka bangdakupur dang ashitsü ayongzüker. Nübortemi 1098 ajanga tongteptsü akok" ta Nikito Zhimomi-isa ashi.

Kaketshirtemi külem

medemtsür ka merenshi

Kaketshir telok kati külem medemtsür ka dak teka sangshiba aser merenshiba video ka social media ka nung kanga proksü. Iba video nung North Town Higher Secondary School (NTHSS), Chümoukedima school uniform agir kaketshir ka dena aliba angur.

Chümoukedima Town Students' Union (CTSU)-i iba tatalokba khukhua aitsüogo aser school ketdangsürtem dang aibelenertem jangjatsü aser parnok tenüngtem agütsütsü tetuyuba agütsüogo.

Iba inyakyim atema tatok magütsütsü aser school-i teinyaksü tim inyaksü imlar ta CTSU-i ashi.

Nübortemi ola adokba sülen North Town Higher Secondary School-i Directorate of School Education, Kohima nung Principal Director dangi shidi ka zülüogo.

Iba shidi nung kaketshir ka NTHSS nungi lir saka tanüngba kaketshirtemji parnok school nungi masü ta shia lir.

Iba tatalokba ya onoki süoki

ia bilemer aser temzüng lateta aliba ama kaketshirtem dak disciplinary action tapet agitsü ta NTHSS-i metetdaksüogo.

Külen, Konyak Students' Union Chümoukedima (KSUC)-i iba tatalokba aitsüogo aser school dang kaketshir dak disciplinary action agitsü metetdaksüogo.

NBSE-i anti-ragging aser anti-bullying indang nenshir

Nagaland Board of School Education (NBSE)-ia registered schools ajak dangi anti-ragging aser anti-bullying measures akangshia inyaksü nenshia metetdaksüogo.

Ibala inyakyim ajanga kaketshirtem taküm libaliro aser tekolok nung kongshiba dang masü saka learning environment telatet alema lir. Anungji school ajaki mapang shia ragging aser bullying atema awareness aser counselling sessions ayonga agitsü tetuyuba agütsür ta NBSE-i ashi.

NBSE-isa school ajak dang staff, tsüraburtem aser kaketshirtem dena anti-ragging and anti-bullying committees tentettsü aser complaint/suggestion boxes ayutsü tetuyuba agütsüogo.

Nukmen Arogo lanurtem shisatokden sentong aka



Dimapur, Aami/June 2 (TYO): Tanü asüng alima nung yangersen (technologies) tasen adokjen adoker aser iba jagi kechisarena ajak melenshia aor. Tatishitsü agi küm ishika tejaklen mobile handset Nokia black N White amshia liasü; tanü asüngbo itemji khenyongi melendoker tang yanglutetba smart phone tapu balala amshiteper. Saka Aor sobaliba, tetsü oshi aser Aor jayajakobo kodanga memelenshir. Yashi koma liasü, tanüa yamaji, asünga kasa dang alitsü ta Wb. P. Alem Jamiri ashi. Pai iba o ya yashi Nükmen Arogo lanurtem "Back to the Roots - II" omen nung shisatokden sentong nung jembidang ashi.

Lungtrok nungi bener aruba Aortem senti senmangji oshi aser sobaliba ya lir. Tanü lanur shirnoki itemji angazüka yudir tarutsü nung lenir tajung ka asütsü ta paisa lanurtem dang ashi.

Tanü asenoki angazüka beshibatem ya reprangdangra asüngbo tejen kümer alir, saka Ao kini tsürabur mapang nungi jembia aruba Ao oshi aser sobalibajibo tarutsü nunga kasa dang asutsü. Anungji kodanga

memelenshitsüba Aor senmangji tanü lanurtemi angazüka ayutsüla, itemjibo taküm piyong asoshi memelenshiba senmang asütsü, iba kasajisa tarutsü nung nenoki pei chirtem danga sayutsü ta P. Alemisa lanurtem ayongzük.

Aor sobaliba nükmenji tetsü oshi lir. Saka tanü lanurtemi pei oshi meima mejembiba agi asen tera (roots)-ji tashi mait kümdaktsür. Kodang tera tashimait südir süngjang tajung matangsü. Anungji ajaki pei oshi meimtsüla, angazüksüla, jembitsüla; tang mapang ya lanurtemi pei kin senmangji wazüka meyura ayatai asutsü, ibaji tetsü oshi dak tera ayang nung dang takok ngutettsü ta paisa shisem.

Nisung kati pei oshi memettra pei kidong tashi mejangjatsü, idangji kibalembu masüngtet akümtsü; tarutsü mapang nijaren aser Aor lokti nung tebenja iba nungjagi tenzüksü. Anungji tanü lanurtemi pei kidong, shirnok den lembutsü/ melembutsü ibaji shitak angazüka alitsüla. Aorbo kidong kasa melembur; ibaji sobaliba anema lir, yangji

aibelenerbo yimdak nungi aritoker aser Aor lokti kecha nunga mamshir ta Wb. P. Alemisa lanurtem nem kibalembu koda asüngteta alitsü aser iba tajangzük shisatsü agüja liasu.

Kodaser Ao oshi angazüksü, zülumen shitak zülutettsü, jayajako shitak ajatsü ta asüba indang paisa lanurtem nem tasa balala tesayuba jenti agüja liasu. Israel nunger otsü nungji reprangra Abraham, Dawid, Solomon nunger otsü medeni par sobaliba mabensar. Yamaji tanü lanurtemi Aor tera shilua meyangershira tarutsü nung Aortem kanga sasatsü; tanü lanurtem shisa kaa mapang tajung alangzük kaka sudi ta paisa lanurtem saksalemdakja liasu.

Aor senmang tera yangershitsü asoshi Ao Riju dang masü arok wadang tuluka lir. Tanür tain, tulu tila ajaki iba külem wadang nung shilem tajung agia asen senti senmang wazüka ayutsü meranga inyakdi; tajungba kümdaktsütsü asoshi nübur ajak tetsü oshi pukümer senso tajung kaka sudi ta paisa lanurtem ayongzüka liasü.

Pfutsero aser Noklak nung lokti nübuttsük ayonger

Dimapur, Aami/June 02 (TYO): ADC Pfutsero, Mhalo Humtsoe, NCS ajanga sangdong ka nung, "Ending global plastic pollution" omen nung ajemdaker World Environment Day nüngtem nung lokti nübuttsük sentong ka June 5, 2025 anepdang 8:00 ako nungi tenzüka alitsü, ta metetdaksüogo.

Iba sentong takok angutsü asoshi Pfutsero jila nung aliba nübur ajunga dang yariteptsü ayongzüka liasü.

Maneni District Administration, Noklak ajanga sangdong ka nung Noklak District ajunga nung June 5, 2025 anepdang 7:00 ako nungi tenzüka lokti nübuttsük alitsü, ta metetdaksü.

Iba lokti nübuttsük mapang kilentsü aoba lenmang müreksü aser jana indoktsü, tesem balala nung süngdong-lidong kongsang angumtsü, tzü atsüngtentsüba tesemtem müreka tzümetsüng aser tzü nungi adokba tashidak balala nungi kumzüka alitsü

mera agitsü.

District Administration ajanga Noklak district nung aliba nübur ajunga dang iba sentong nung shilem agitsü ayongzük, ta sangdong ajanga ashi.

Iba sentong nung Noklak Town Council ajanga Noklak jila telungzük ketdangsüa inyaktsü, VDMs/Village Councils ajungai pei aliba yimtsüngtem nung ketdangsüa agitsü, HoDs aser Institution balalai pei aliba tesem nung kasa sentong ayongzüksü.



Raj Bhavan, Kohima nung June 2, 2025 nü Ek Bharat Shreshtha Bharat inyakyim kübok 11th Telangana State Foundation Day munga liasü. Iba sentong nung Nagaland Angh La Ganesan-i telungjem nung alitsü tayongzükba o jembi aser Thavaseelan K, IAS, Commissioner & Secretary to the Governor aser Nagaland Telugu Samaj tir Sankar Surada nungeria o tatsütsü jembia liasü.

Mokokchung Police-i sangdonger

Mokokchung, Aami/June 02(TYO): Mokokchung Police sangdong ka nung 2025 küm May ita nung Mokokchung nung aliba Police Station ana (2) nung tatalokba balala nung case 5 tashi benoka lirta Addl. Superintendent of Police & PRO, Mokokchung ajanga metetdaksüogo.

Kasa sangdong nungsa item maparentem ya Mokokchung Police-i kanga nentaka inyakba aser talisa Police-temi timtem arema nentaka inyaka

bushitsüngdang ajanga inyakta aser iba ya ajanga nübur kanga ajangzükogota metetdaksü.

Mokokchung district nung tim masüba mapatem inyaker aser miim mozü, yi shibelener osangtem anasatiba Police Station nung agüjang aser osang agütsürtemji Police-i miimbanga ayutsüta kasa sangdong nungsa Addl. Superintendent of Police & PRO, Mokokchung ajanga metetdaksüogo.

Kohima nung aliba 105 BN BSF ajanga public auction alitsü

Dimapur, Aami/June 02 (TYO): Border Security Force (BSF) indang 105 Battalion ajanga sangdong ka nung, par kübok aliba ki o jen tejentem public auction alitsü, ta metetdaksüogo.

Iba auction ya June 14, 2025 anüngdang 11:00 ako nung e Headquarters of 105 Bn BSF, Chedema, Kohima, Nagaland nung alitsü.

Iba auction ya Board of Officers tem lia "as is where is" yimya nung agitsü.

Jangra aliba bidders aser party tem iba sentong nung tsüngtong arua shilem agitsü ayongzük.

Iba auction dak sendakba osang tejangja official BSF website at www.bsf.nic.in nung angutsü, ta sangdong ajanga ashi.

The Sunshine Orchestra, Nagaland Chapter ajanga sentong ka ayongzük



Dimapur, Aami/June 02 (TYO): AR Rahman Foundation kübok project ka, The Sunshine Orchestra, Nagaland Chapter ajanga May 31, 2025 nü Centre of Excellence for Music & Arts, Kohima nung parnok indang mezüngbuba musical recital sayua liasü, kong Advisor, Water Resources, Government of Nagaland, Tongpang Ozukum sentong akhumdong ka ama dena liasü.

Advisor Tongpang Ozukum-i iba sentong nung jembidang The Sunshine Orchestra, Nagaland Chapter ajanga recital performance mezüngbuba asoshi tenüngsang agütsü aser ibai sempet sayuba kisüng masü saka terenlok aser takok anguba benjong ka lir, koba The Sunshine Orchestra ajanga TaFMA tenüng nung Chief Minister, Dr. Neiphiu Rio sentong kübok 2019 küm MoU züluteper küm pongu nung inyaktetba alitsü, ta ashi.

TaFMA, AR Rahman Foundation aser The Sunshine Orchestra asoshi alizüng ka tongogo, ta pai ashi.

TaFMA-i bendanga agütsür inyakba aser par mangdang ajanga tanü Nagaland nung kentenba melenshitsüogo aser kentener tem aniteta Nagaland aser Naga nunger ken national aser international jenjangi ajungketogo aser Naga nunger lungjemtsü asoshi maitsü ka ama sempet sayutsü sapang

balala agütsür, ta pai ashi.

Paisa ashiba agi, AR Rahman Foundation ya tajemzükba jenjang nung aliba tanurtem dak sempet jangjateta angati musical training agütsütsü nükjidong nung 2008 küm tenzük.

Anungji pai AR Rahman dang Nagaland tashi arua iba Foundation ajanga tajemzükba jenjang nung aliba tanurtem kentenba tsütsü teyari agütsüba asoshi pelaba lemsatapa liasü.

Advisor Tongpang-i tanurtem dang The Sunshine Orchestra nung adentsü ayongzüka liasü.

Chairman, TaFMA, Theja Meru-i pela agizükba o jembidang, The Sunshine Orchestra, Nagaland Chapter nungya Kohima Orphanage and Destitute Home nungi tanurtem lir, koba 2019 küm Chief Minister Dr. Neiphiu Rio ajanga tenzüksü aser tanü iba Orchestra nung tanur 20 lir, ta ashi.

Iba sentong nung The Sunshine Orchestra, Nagaland Chapter indang director Vilhou Kezo aser pianist Kecha Pfukri nati anir violin students parnok tokui musical recital ajanga shilem agi aser Zavino Nakhro-i temeja ken ka aten aser Wenwen-i piano recital ka agi shilem agia liasü.

Iba sentong Dr. Hovithal Sothu lenisüba kübok agi asr Aleno Sale-i melepzüng o jembia liasü.



June 02, 2025 nü Tavistock Square Gardens, London nung BJP MP, Ravi Shankar Prasad-i aniba MP tem telok kati Mahatma Gandhi kürakyanglu semdanga akhüm agütsüba sülen tangokba noksa nung angur.

MP Supriya Sule-i aniba Parliamentary telok Egypt tonga ogo

New Delhi, Aami/June 02 (Agencies): NCP MP, Supriya Sule-i aniba Parliamentary teloki Ethiopia semdangba sülen Hombarnü Egypt tonga ogo.

Ano JD(U) nungi Rajya Sabha MP, Sanjay Kumar Jha-i aniba teloki Hombarnü Kuala Lumpur nung India nung den shisa lemsatepa liasü.

Operation Sindoor outreach kübok Parliamentary telok tenet tenteta parnoki linük 33 semdanga India-i kiralongra anema raratsü melungtetba aser Pakistan-i kiralongrartem yarıba osang sangdonger.

Ethiopia aser Algeria na semdangba mapang nung item linük nung ketdangsertemia India-i kiralongra anema raraba pusema liasü.

Supriya Sule-i aniba teloki Egypt nunga ketdangsertem ajurua India-i kiralongra khenyongi magizüktetba osang lemsateptsü. Hombarnü parnok Egypt yimtiba, Cairo tonga aoba mapang nung India ambassador to Egypt, Suresh Reddy-i parnok agizük.

Parnoki Egypt nung Minister tem aser MP tem ajuruba den külemi think tanks aser osangbenertem den shisa lemsateptsü aser yangji aliba India nungertema ajurutsü.

Addis Ababa nung aliba Indian Embassy-i sangdong ka ajanga, NCP MP Supriya Sule-i aniba teloki Amongnü tashi nung Ethiopia nung sentong ajak tembanga agiogo, ta metetdaksü.

Ethiopia nunga parnoki tongti ketdangsertem, osangbenertem, shisashirtem, lokti tentet balala nungi lenirtem, think-tanks aser India nungertem ajuru, ta sangdong nung shia lir.

Ethiopia nung ketdangsertemia kiralongra khenyongi magizüktetba lemsatepba den külemi kiralongra ya aitsütsüla, ta shiogo.

Kiralongrartemi Jammu &

Kashmir nung Pahalgam amakba sülen Ethiopia nung lenirtemi India den tejashi lemsatepba atema India nung MP temi parnok dang pelaba lemsatep.

Ano külen Hombarnü MP Sanjay Kumar Jha-i aniba teloki Malaysia yimtiba, Kuala Lumpur nung India nungertem ajurua shisa lemsatepa liasü. Iba telok nung züngsem Trinamool Congress MP, Abhishek Banerjee-i, Pakistan den Pakistan occupied Kashmir (PoK) India nem tanaben agütsütsü atema dang jembitsüla, ta ashi.

"Onoki parnok (Pakistan) den tesüiba küm aika jembia arudar. Sorkartem melenshiaka Pakistan den mangatettep alibabo teti lir," ta pai ashi.

"April 22 nü tatalokba nung tamangba yimsü aser atsüapong nung ajemdaker nisung 26 khaseta liasü. Pakistan den ken o jembitsüji Pakistan-occupied Jammu & Kashmir tanaben meyipa agütsütsü atema dang jembitsüla. Yamaji mesüra kiralongrartemi maneni amaksü," ta Abhishek Banerjee-isa ashi.

Ano külen MP Baijayant Jay Panda-i aniba teloki Amongnü tashi nung Algeria nung ketdangsertem ajurua jembio. Panda-i aniba teloki Algeria nung lenirtem dang, kiralongra ya alima asoshi tebilemsü onük ka lir, anungji ajaki longjemer iba tebilemsü atema inyaksü nüngdak, ta metetdakja liasü.

Algeria nung Panda-i aniba teloki think tanks züngsemtem, India nungertem, Ministry of Foreign Affairs nungi ketdangsertem, National Community Abroad aser African Affairs of Algeria nungi lenirtem ajurua liasü.

Parnokisa Algeria nung Minister of Foreign Affairs atema Secretary of State, Selma Bakhta Mansouri ajurua

kiralongrartemi Pahalgam amakba, India-i Operation Sindoor agiba aser India-i telemtetba balala agia inyakba la nem metetdaksüogo.

Ano külen MP, Kanimozhi Karunanidhi-i aniba teloki linük pezü semdangba sülen tang tesüsa Spain semdang.

Hombarnü DMK MP Kanimozhi Karunanidhi-i aniba teloki Spain nung Mahatma Gandhi kürakyanglu semdangba lenir nem akhüm agütsü, ta Madrid nung aliba Embassy of India-i sangdong ka ajanga metetdaksü.

Iba sülen parnoki Spain nung aliba India nungertem ajurua shisa lemsatepa liasü.

Spain nung parnoki tongti ketdangsertem, MP tem aser lokti tentet balala nungi lenirtem ajurua senden amentsü.

Maneni Congress nungi MP Shashi Tharoor-i aniba teloki Colombia semdangba sülen Amongnü Brazil tonga ogo. Brazil tonga aoba mapang nung India ketdangser, Sandeep Kumar Kujur-i airport nung parnok agizüka liasü.

PM Modi-i Canada nung ayongba G7 summit nung madentsüa akok

New Delhi, June 02 (Agencies): Tesüiba küm 6 tsüngda tang mezüng Ato kilonser Narendra Modi-i G7 senden nung medentetsüa akok.

Taküm G7 summit ya June 15 nungi June 17 tashi Canada nung ayongzüka lir.

Tang tashi nungbo Canada-i official süa tejaokba shidi agüja mali, ajisüaka Ato kilonser Modi-i Alberta yimti nung ayongzüka senden nungji madentsüa akok.

India aser Canada na tsüngda tesendaktep junga mali, iba denji külemi G7 senden nung adentsü atema tang tashi tejaokba shidi magütsü. Oda mapang tatong nung tejaokba shidi agütsüyonga Modi-i iba senden nungji madentsüa akok.

Modi-i iba senden nung adentsü atema Canada-i ao nunga Khalistani/Separatists-i pa anema longkak aittsü.

Canada den tesendaktep

junga meliaka tang lenir tasenba Ato kilonser Mark Carney aser Modi nati linük ana tesendaktep yanglushitsü bangjema lir.

Tang tashi Canada-i G7 summit nung adentsüpurtem tenüng mesangdong, ajisüaka Canada nung osangbenertemibo iba senden nung adentsü atema Australia, Ukraine, South Africa, Ukraine aser Brazil linüktem nungi lenirtem jaokogo, ta metetdaksü.

Taoba hopta Sikh separatists-i Carney-i aniba sorkar dang G7 senden nung adentsü atema India Ato kilonser mejaoktsüla, ta mepishiogo.

Tamalen Canada nung separatist lenir Hardeep Singh Nijjar tepsetba atema taoba mapang Canada Ato kilonser, Justin Trudeau-i India sorkar nem tai tonglokja liasü. Iba mapang nungjagi tenzüka linük ana tsüngda tesendaktep raksa.



June 02, 2025 nü Hyderabad House, New Delhi nung senden ka amentsü lia Ato kilonser Narendra Modi aser Paraguay Tir, Santiago Pena na salemdang tangokba noksa nung angur.

Tender Number - THF/HO/AD/2025-26/001 Tender Dated - 03rd June 2025

INVITATION FOR BIDS FOR SALE

The Hans Foundation (THF), established in 2009, is a Public Charitable Trust working towards creating an equitable society by empowering marginalised and underprivileged communities in India. Invites sealed bids from eligible and interested buyers to purchase used Vehicles (MMUs-AMBULANCE), office furniture, office equipment, and IT assets. The assets are being sold on an "as-is-where-is" basis.

Last Date for Submission of Bids-	18 th June 2025 till 11:59 PM
Date & Time for Opening of Bids-	19 th June 2024 at 03:00 PM
Category	Description
Vehicles - Ambulances)	All vehicles are in running and good condition. Models include Force Motors' Traveller, Tata Yodha and Tata Winger, etc.
Office Furniture	All furniture is in new condition.
Office Equipment	All equipment is in good working condition.
IT Assets	All IT assets are in running and good condition.
Portable Lab Machines	All machines are running and in good condition.
Download the Tender Document by scanning the barcode or go to the link below.	

Link - <http://thehansfoundation.org/bids/>



The Hans Foundation

Wing B, 7th Floor, Milestone Experion Centre, Sector 15 Part 2, Gurugram, Haryana - 122001



GOVERNMENT OF NAGALAND

DIRECTORATE OF TECHNICAL EDUCATION

Nagaland : Kohima-797004

NO.DTE/ESTT-2/3/2016-17/7413



Dt. Kohima, the 2nd June, 2025.

NOTIFICATION

NO.DTE/ESTT-2/3/2016-17: This is to inform the interested candidates to collect a prescribed application form for Diploma Course outside the State during 2025-26 session from the Directorate of Technical Education, Kohima (Below New Secretariat Complex) on payment of Rs.300/- (Rupees three hundred only) with effect from 03-06-2025 to 13-06-2025 during office working hours. The form may also be downloaded from the website <https://dte.nagaland.gov.in> in which case the fee should be submitted in cash along with form printed in white paper (A4 size) by hand.

The last date for receiving the complete forms by hand is 16th June, 2025 after which no request will be entertained. The selected list of Candidates shall be notified on or before 23rd June 2025.

Sl. No	Name of course	Seats	Eligibility	Place
1.	Diploma Pharmacy	3	10 + 2 Science with Biology	Gujarat
2.	Architecture Assistantship (for girls only)	5		Tamil Nadu
3.	Computer Aided Costume Design & Dress Making (for girls only)	2		Gujarat
4.	Electronics & Communication	5	HSLC Passed with 40% in Maths & S Science together for ST candidate 5 and 50% for General candidate.	Tamil Nadu
5.	Electronics & Telecommunication	10		Maharashtra - 7, Orissa - 3
6.	Electrical & Electronics	10		Maharashtra
7.	Mining Engineering	1		Orissa
8.	Printing Technology	1		Tamil Nadu
9.	Automobile Engineering	8		Himachal Pradesh - 3, Delhi-1, Maharashtra 3, Orissa-1

Sd/-
(Er. VIPULHOU LHOUGU)
Director



TIR YIMYIM YIMOBILEM (EDITORIAL)

DIMAPUR TUESDAY, MAY (AAMI) 03, 2025

Ano kümdangshitsü mapang

Covid wara agi asenok amokmerenba mapang timtem tekangshi aser mangyim jashi ajuruba anogotem to tebilemteta mebilemtetnui alidang, ano tanga kasa Covid wara agi asen lima tonga aruba osang angashidang kanga shisabolua bilemer, kechiyong asenoki tenük agi manguba tashidak wara anema nokdaksüba ya temela masü. Ibayongji, tetsübu asüyonga metsübutsäla masü kechiyong ibai tasüba wara tashidak ka lir aser shingaia mesüner. Aji oda, taoba küm pezü jakdang Covid wara agi mezüng asen lima amakdang asen medemer, kinunger aser chirnurem dena bendanglen nungi arudang, pelatepa salemtapa ajuruteptsü melen tajurutepa majurutepteti temulung shiranga kidangia marudaktsüi quarantine center-i yokba anogotem to temenungratsüka saka temulung ashitsüka bilemteter. Atangji, asenok asoshi Covid wara toa asenok tamang, temeim aser tasü ait mait tendangba tatidang ka liasü. Aji oda, asenok aikati tamang tulu agi sarasadema Covid agi timtemer aser asü-ama ajururtem tsüngdong oa ajurua yaritepogo. Ano aikati Covid mapang temeim agi nüngdakba purtem aika yariogo aser ano aikati tasütsüa metsübu quarantine center aser mozü kitem semdanga nüngdakba purtem den yaritepa inyakogo. Ajisüaka ano, tesem aika nung quarantine center-bo lapoka ayu saka bendanglen nungi arurtem tagizüker mali tsübutepba tia dena ajuruogo. Ano, quarantine tesem kar nungbo yangji alirtem nem chiyongtsü bener oa agütsür-a mali timtem ajuruba otsüa lir. Ibaji dang masü saka asenok arogotema karbo temeim mapabo inyakner saka tasü tsübuba agi temai adoka temeim mapa inyaker mali aküm nungji, arogo nunger tenla sen tangar tamangba yimsü amangertem nem oa agütsüba otsüa lir, kechiyong parnokibo akhi mapang nüngdakba purtem asoshi chiyongtsü renemja temeim mapa inyakba ama, Covid wara tialong nunga kasa temeim mapa inyaka liasü. Aji oda, ni teburchi wabong, shibai kechi shinür ta molushishia alidang, ajungbena keyi ka tsüteta adok nung nok nü ajak peretdoker ajen ama, tamang aser temeim indang kanga raa jembia alirtem to Covid wara aru tashi nungbo tamanga aser temeima tenük agia mangu jena oadokba otsü tesem aika nung atalokogo. Itemji asenok asoshi mezüng Covid wara tatidang nung takok aser tamakok anguba otsütem lir. Atangji, shibaibo temenatpba tashidak dang masü saka tasütsü wara metsübutsä ? Ajisüaka, asenok Khristan aser yimten nunga senso tajung ka asoshi tasütsü tsübua shiranger aser timtemertem den meyariteptsü na ? Ibajibo tilaka dang saka asenok Khristan taküm aser senso ka asoshi pei nübortem rongnung ka Covid wara mapang asü nung, iba mangji taremer mali toktsüba nübortemji nokinketer aser tamang tir kin asütsü na ? Joko, asenokbo tia junger majungka, Covid wara timtem aser takoksa ajururtem lir, anungji tangbo Covid wara nungi kodaser asenoksasa jenbua litettsü aser Covid wara mapang nunga kati ka koda yaritepa litettsü, item teinyaktsü nüngdaktemji metetadokogo. Iba jagi asenok tasü itdaksür aser kangabo shisabolua mebilemer. Aji oda, taoba mapang Covid wara den raradang asenoki jembia aruba ama, Covid ya meyipa maotsü saka asenok den alitsü, anungji asenok karbo Covid agi shiranger ser nung yimra manga agi atong ama dang bilema alitsüa akok. Atangji, Covid wara maliyonga asenok taküm ya mashimashi yimbazüa alitsüba taküm masü, kechiyong asenok meketa tzü mopong nung tashidak tejen aser tasen agi sünga lir. Aji oda, anogo shia asenok tanela taküm nung tatidang balala den raraba ama, asenok shi temang anema alitsü asoshia tashidak wara balala den raraba tongpang nung anogo shia nokdaker. Joko, tangbo asenoka Covid arung taru, tamang aser tangatetba mitsa nungi maitsüi ochi aser temeim sübutsä sübor nokdaktettsü imlar. Aji oda, tangbo asenoki tenla tajung agütsür tangar nem inyakdaksüba kisüng masü saka asenoka dena tsüngdong oagi nübortem den timtem aser mangyim jashi lemsatepra, Yisu temeim lemsateptsü asoshia mapang tajungtibaji Covid mapang asütsü.

OLEMSABANG

Asen lima nung lisopur tzümar nem amokbangdaksür

~ L. Kika Pongener

(Yashi adok nungi...)


Ano kanga tekümdangtsü kaji, tzüma-longmar kari Naga nunger kar kidang ashi auya aser ashi-külak mapa inyakba meji merenshira, asen Naga nunger takar, tulur, sentsü-keter (Self Style VIP) kar arur parnok poküma asen Naga nunger-jiang amokmerena merenshir anizüka anir aoba-a lir. Iba amaji asenok lendong nung lir ta metetsümongaka asen Naga nungeri-sa asenok mapa kar nung parnokji hadir amai amshiba ajanga parnok temulong kanga uludaktsür, aser joko item nisung nem ya asen Naga nunger-ang meyiper amokbangdaksütsüsa tensa mapang kati menepa arudagi. Ya tangar shinga nem-a tai agütsütsü mali...."An molokpang nung atemba ama" asenoki asen sasa inyaksaba agi asenok khangshir. Anungji Dimapur, Chumoukedima aser Niuland District asem nung ya kanga tenuk yoka, temulong agüja ILP mapa ya tenzüka inyaktsüla. Iba tebilemtsü ya koktetsü asoshi Naga Students Federation (NSF)-i anir kaketshir ajaki temulong agüja inyaktsüla, talisa, Dimapur Naga Students Union (DNSU)-i temulong kanga agüja inyaktsüla. Ano Dimapur Naga Council-i kanga nungita inyaknungang takok angutsü. Ano asen Naga nunger ajaki kanga junga angatettsübaji....Dimapur temeküt nung aliba yimtsüngtem nung Council Chairman aser Gaon-bura-temi tzüma-longmar nem Permanent Residency Certificate (PRC) tapi-tapi agi magütsütsüla. Ano kangasa tekümdangtsü kaji.....Council Chairman & Gaon-bura masüba nisung (Self Style) kari sen ajangzüksü mechi tiyazü Seal & Writing Pad yanglur PRC Certificate amshia alitsü akok. Anungji Dimapur temeküt yimtsüng ajak nung yimsusuri anir nubur ajaki kanga kümdanga meita reprangtsüla. Aji oda, sen teraka angutsü meji nung asen Naga nunger lisopur temeden putu aika asoshi yoka achitsüba tamaji shisatsü Naga nunger shinga daka malitsüla.

North-east India nung Assam aser Tripura State nung balaka item Illegal Bangladeshi Immigrants-tem nem lisopur amokbangdaksür, jokorla, pei lima nung bendangertem-ang kibur kümdaktsür kanga timtema aliba asenoki ngudagi. Ajisuaka, mapang kanga suiadoker yanglushitsü makokba tia ka nung lir. Asen Naga limabo ano tanü tashibo iba tia jagipo memenepi lir....Anungji mapang kanga memenudang temulong agüja inyaktsüla. Talisa, Dimapur, Chumoukedima aser Niuland District asem nung ya Inner Line Permit (ILP) ya kanga suoki yia reprangtsüla. Iba mapaji sorkar-i kanga nendak-nendaka inyaktsüla aser iba mapa nungji kaketshirtem aser mulongtet telok ajungai nungittsüla. Aser iba mapa inyakdang kanga tekümdangtsü kaji, Muslim kin ajunga ya Illegal Bangladeshi Immigrants (IBI) amai mebilemtsüla aser tzümar ajak ya ashishitsü aketba kin amai mebilemtsüla. Asenoki itemji kanga junga mebendangtetra, lendong tulu menatsü ana nung lir. Asenoki tzüma-longmar ta ser tapi agi jungjunga mejangjai kar dak tashiyim mapa kar inyakra, Social-Media ajanga minute-second tsüngda nung India lima ajunga ayimsunga aotsü aser India lima nung asen Naga nunger kaketshir aser company balala nung inyakertem tali majungtsü aser lendong tulu ataloktsü. Anungji mapa tajung ka inyakdang lendong memenatsüsa kanga kümdanga inyaktsüla. Tzümar rongnunga PRC angutsü temeden akaba karbo lir ibaji bendanga meteta inyaktsüla.

Sorkar-i Dimapur, Chumoukedima aser Niulang District asem nung Inner Line Permit (ILP) mapa tenzüka inyaktsü telemtetba agiba osang ngua nubur ajaki mapang shitak ka nung iba mapa ya inyaktsü telemtetba agiogo ta sorkar dang pelar. Kechiyong Dimapur temeküt nung iba ILP mapa takok mongui aliba yagi Naga nunger nubur ajunga temulong animesungzükteter. Asen lima nung asenok lisopur mapa teinyaktsü maka kazüteper, aser tzümartembo mapa inyakera meinyakmai asen lima nung parnok takar akümer. Dimapur yimti nung balaka shishilempaba mapa ajunga tzümartemi ajepbangogo. Aser nutsüng yongsuk züina aoba ya reprangdangra manger-mesangwa tsüngda aikasa züina odagi. Anungji ILP mapa ya kanga suoki yia, nendak-nendaka, temulong agüja meinyakra, küm ishika sulenbo tzüma-longmar nem asenok moksepdaktsütsü, aser asen lima nung asenok ola-a tashi-i madoktetsü aser talitsü mesademi akümtsü kecha menua mali.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ukraine raramapang nunga osangtajung proker: David Karcha



David Karcha

Berlin, June 02, 2025 (Agencies): Ukraine nung tang tashi rara manener, ajisüaka tanela asentenshi milak jangrudar, ta Ukraine nunger sayutsüngir, David Karcha-i metetdaksü.

May 29, 2025 nü Germany yimtiba, Berlin nung European Congress on Evangelism sentong nung jembidang Karcha-i Ukraine tesem ajaklen nüburtem atema Arogotem ya teimla agütsüba tesangwatem kümogo, ta metetdaksü.

Paisa, tang Ukraine nung timtem tulu aliba mapang ka nung nisung meyrjang aikati Khrista agizüker, ta metetdaksü.

Anogo ishika tejaklen Berlin yimti nung sayutsüngir, Franklin Graham-i Ukraine Tir Volodymyr Zelenskyy ajurua Ukraine nung yimjung atema sarasadema liasü.

Timtem-lendong mapang nunga Khrista osangtajung menokdangtet, ta shia Karcha-i, "Yimjung aliba mapang nung Khrista osangtajung ya kanga tashitait. Ajisüaka rara mapang nunga osangtajung ya menokdangtet," ta metetdaksü.

"2022 küm February ita nungi Russia-i Ukraine amak tenzükbä sülen nungi Ukraine nung evangelical lenirtemi kanga tongtiban tayongzükbä ka ajurua liasü- jena oadoktsü asü pei nüburtem den külemi timtem tejashi lemsatepa alitsü? ta telemteba agitsüsa tensa ka ajurua liasü. Tamang agi tilaka danga inyakaka ibaji ajanga tuluka ataloker," ta pai ashi.

"Teimla ya atangji aser meimchirtemi teimla nüngdaker. Ukraine nung Arogo atema teimla lenmangji Kibuba Yisu dak anguba tesangwa lir. Ibaji ajanga ajak longjemer tejakleni aoer. Yamaji inyakba ajanga rara agi-a menokdangteti osangtajung proker," ta pai ashi.

Ukraine nunger Khristantem reshikangshiba osang metetdaksüdang Karcha-i, "Osangakettem nung tongti otsüji Ukraine nung evangelism lir, nisung jenti Khrista dangi meyipier. Ukraine nung pastor kati ashiba agi, 2023 küm kija

nunga Baptist Arogotem nung nisung meyrjang aikati baptia Khrista agizükogo," ta metetdaksü.

"Linük nung Arogotem rongnung tanela tsütsü tetzüraba lir. Arogotemi nüburtem ali shi nüngdak peritsütsü atema inyakba dang masü saka tanela nüngdak-a peritsür. Tesüiba küm asem tsüngda nisung meyrjang aika Tenla kitemi oa Tsüngrem temeim ajangshiogo. Nisung aika tang mezüng Tenla kitemi aoertem lir," ta pai metetdaksü.

Karcha-isa tesüiba küm ishika raraba mapang nung Europe nung aliba Arogotemi Ukraine nungertem dang temeim sayua yariba atema pelaba metetdaksü.

"Khrista temangji linük ka kija nung masü mesüra arrtsü kecha mali, ajisüaka Pa nüburtem aliba tesem ajak nung lir. Nüngdakbapurtem yariba

atema pelar," ta pai ashi.

"Ukraine nung aliba Arogotem tongbang tejaklen lir. Raraba tesemtem aser hospital tem nung Arogotem nungi aika chaplain ama inyaker, sarasademtsür aser Khrista dak anguba teimla agütsür," ta pai metetdaksü.

"Onoki takoksa anguba sepai kinüngtsürtem aser lajartem yarir aser timtem lemsateper. Ajak takoksa angurtem onoki anepalur. Russia nunger sepaitem ajanga raksatsüba kibongtem aser takoksa anguba tanelatem onoki anepalur," ta pai ashi.

"Onoki nüburtem timtem angar, iba sülen parnok atema sarasademja yarir. Iba sülen onoki parnok den Khrista osang lemsateper," ta pai ashi.

"Adianutem. Iba ya Tsüngremi ozü linük nung inyakba tilaka dang lemsatepba lir. Pai linük nung Arogotem asentenshitsür, teimla bushidaksür aser Pai jembiba angadakja Pai inyakba mapatem onok dang sayur," ta pai ashi.

"Alima nükdangbo Ukraine ya raraba otsü ka lir, ajisüaka Tsüngrem nükdangbo iba ya tanela asentenshiba otsü ka lir aser Khrista osangtajung tejakleni aoba otsü lir. Onok anasa rocket bomb apokba mapang nung Khrista tamendakdak akanga lir," ta pai ashi.

O tembanga Karcha-i Europe nung evangelical lenirtem dang kechi tensa ajurudir ajuruaka Khrista osangtajung tasü itta sangdongtsü ayongzüük.

UK tesem ajaklen Arogotemi ghonda 72 tashi sarasademtsü

June 02, 2025: June 6 nungi June 8 tashi Pentecost mapang UK nung Arogotemi ghonda 72 sarasademtsü; iba ya 'Shine Your Light 2025' mapatong dak sendakba sentong ka asütsü.

National Day of Prayer and Worship (NDOPW)-i ayongzükbä campaign ya tamangertem sarasadem nung longjemdaksütsü aser linük nung telemsa kanga adokba mapang ka nung nüburtem longjemdaksütsü nükjidong nung ayongzükbä lir.

Taoba ita tetenzüklen Portcullis House, Westminster nung Parliamentary reception sentong ka agia liasü, aser Shine Your Light 2025 tetenzük sentong nungji Khristan tentet 60 nungi Arogo nung lenir 100 dak tali aden.

International Freedom of Religion & Belief indang All-Party Parliamentary Group nung Chair, MP Jim Shannon leniba nung iba sentongji agia liasü.

Pentecost hopta nung

ayongzükbä sentong nungji UK nung linük pezüprongla nungi tamangertem meyrjang aikati shilem agitsü, aser online ajanga agiba sentongji NDOPW indang Zoom-based "Prayer Room" nungi sayutsü.

Sarasademji June 5 ayaterm nungi tenzüktsü. Osangtajung kentener Noel Robinson leniba nung tekülem aser tetushi agitsü aser NDOPW nungi Shine Your Light tentetsang, Dr Jonathan Oloyede-i Tsüngrem o jembitsü.

Dr. Oloyede-i, "Asen linük tesem ajaklen Tsüngremi mapa inyakba osang lenirtem aikati lemsatepba mapang ka nung Arogo ka ama asenokia Tsüngremi mapa tulu inyaktsü atema sarasademtsü nüngdak," ta metetdaksü.

Amongnü aonung 7:00 ako nung Canterbury nung Dr Oloyede leniba nung agiba Pentecost Sunday sarasadem sentongji live sayutsü.

Pentecost hopta nung Arogotemi peipei sasep nung evangelistic sentongtem

ANOGO ABEN TSÜNGREM DEN

Mulungsentsü ajunga agi

"Aser Kibuba ne Tsüngremi ne mulungjang ajunga agi, aser ne taküm ajunga agi, aser ne mulungsentsü ajunga agi, aser ne tashi ajunga agi nai pa meimang". Mk.12:30

Khünü Kibuba Yisu dangi Yihuda nunger ozüng meteter rongnung tezülur ka arua ozüng rongnung tulutibaji koba asütsü ta asüngdangba indang angur.

Par Yihuda nunger tejen yimsü ozüng noklang troksür ter asem (613) agi khangbanger kija, kibong aser tamanger lokti ajunga nung item ozüngtemji Tsüngrem kümdaksür lia aruba mapang ka nung Yisu-i item tesayuba anema aiben jembiba indang Laishiba nung lepa angur. Yisu Khrista mapang nungji yimsü nung tanishirtemi anir tamangertemji (Yihuda nunger)- tema tereprangtsütsüjibo kanga tobur tajung saka temulungjang telung nungbo tesembatsü mapatem agi sünger alibatemi ngua itemji temeim mapa benshiba nem melenshidaktsünübaji Pa taginüba liasü.

Tanü asen tamangertem jenjang ya reprangra Yihuda nunger Farisi, Saduki aser tezülur anemsübatem mesük, asenok tema tereprangtsübo kanga tajung, saka temulungjangbo Tsüngrem nungi talangka pilaa oadokba takümtem, arung mulungsentsü aika adenba tamanger ka masü, saka Yisu-i ashiba O nung azüiter amangdi. "Aser Kibuba ne Tsüngremji ne mulungjang ajunga agi, aser ne taküm ajunga agi, aser ne mulungsentsü ajunga agi, ne tashi ajunga agi nai Pa meimang".

agitsü, sarasadema jajatsü aser outreach sentong balala agitsü.

2023 küm Shine Your Light campaign tenzüük aser Arogotem teimba-teimbai iba campaign nung shilem agia arudar. Yaküm iba campaign nung shilem agiba Arogo 738 liasü saka tangbo 1,500 kümogo.

UK nung denominations aser networks 60 nungi Khristan lenirtemi tanela nung longjemer tesüiba mapangtem inyakba asadangba den külemi tarutsü nung teinyaktsü wadang atema asalentong yanglua inyaker. Item Iba sentong nungji rongnung June 6 nungi June 8 tashi ghonda 72 UK tesem ajaklen sarasademtsü aser December 12 nungi December 14 tashi Khristmas dak sendakba sentongtem ayongzüka agitsü densema lir.

Taoba ita Parliamentary reception sentong nung Khristan ajak dang na aliba tesem nung Shine Your Light sentong agitettsü atema tenzüksang, Dr Jonathan Oloyede-i, "Tan hopta

Parliament nung lenir 100 dak temai iba mission, telongjem aser sarasadem nung Kibubai mapa inyakba lemsatepa aruogo. Asenoki asemji piladaksütsü makok saka ka küma longjemdaksütsüla," ta metetdakja liasü.

"2023 küm Shine Your Light tenzükbä sülen iba campaign kanga renlokogo, ajisüaka Arogo ka ama asenoki iba dang nungjagi taliba inyaka asen Kibuba Yisu Khrista osangtajung lemsateptsü nüngdak," ta paisa metetdaksü.

Item Iba sentong nungji Congregational Federation nungi Jim Lyon-i Northamptonshire nung Shine Your Light sentong agiba lemsatep. Pai, "Yaküm December ita nung onoki nüburtem ayongdena Khristmas osang lemsatepa liasü. Ni reception sentong nung Khristan ajak dang na aliba tesem nung Shine Your Light sentong agitettsü atema maongka meshia sarasademtsü ajungshir," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tenladak

(n) tenla agütsüba tesem, tenla bendendak (altar)

* Tsüngremi tenladak sen masü asenok ochi mulungjang tenla aginer.

Tenok

(v) alu nung metsü aremba, alu aten (seed sowing)

* Luti nung temesüng tsük tenok.

OLONG PAITEP # 7170

	1				2			3		4
5								6		
7			8							
								9		
		10								
11										12
					13					
					14					
15										

TIPLIN

- Balaka
- Aika shirangba
- Tar tatsü
- Nenü'er jabaso
- Sen latettsüba
- Tangar kübok alir
- Lon nung inokba
- Tzü ayimdak
- Ajak

LANGTSÜNGLEN

- Hai sür inyak
- Aor tenüing ka
- Ali telungi talangka lur
- Tebang kenyongi mazüoker
- Ken atema anenzükertem
- Toktepa noktak
- Sen
- Benjong agi
- Telung nung rizünga ayu
- Tebang nung enok

OLONG PAITEP # 7169 TELANGZÜBA**TIPLIN :**

- Aben, 4. Artsü, 7. Lisem, 8. Liwa,
- Sarasadem, 12. Aket,
- Mangu, 15. Anünü, 16. Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung,
- Dokan, 13. Tinu.

NAI-A YA METETTER MA

Australia tsür Olivia Vinson-i ghonda 24 nung 7,079 pull-ups süteta Guinness World Record ka ajatetogo. Arishi küm 34 tain Olivia ya fitness enthusiast ka lir aser la kinungbo aser coach-i ajungmesoba sülen "most pull-ups in 24 hours (female)" ajatetogo. 2021 küm Polish tsür Paula Gorlo-i pull-ups 4,081 süteta otsü yanglua liasü saka ibaji Olivia Vinson-i ajatetogo.

NEIGRIHMS nung Ozaki procedure takok ngua agiogo**Guwahati, May 31, 2025**

(Agencies): NEIGRIHMS, Shillong nung Department of Cardiothoracic and Vascular Surgery (CTVS)-i Ozaki procedure takok ngua agitetogo.

Ozaki procedure dang Aortic Valve Neocuspidization (AVNeo) ta-a ajar.

Ozaki procedure nung shiranger indang temulungjang nung aliba tissue amshia valve raksar aliba yanglushir. Ajisüaka, tanga valve replacement nungbo metal mesüra animal tissue ajanga yangluba artificial valves amshir.

Japan nung aliba Toho University Ohashi Hospital nung Prof. Shigeyuki Ozaki-i Ozaki procedure ya tenzükba lir.

Tripura nungi arishi küm 10 tanur tetsür ka aser Assam nungi arishi küm 69 tain tambur kati NEIGRIHMS nung Ozaki procedure ajanga tajangzük nguogo.

Iba procedure ya Dr. Reuben L. Kynta (Head, CTVS)-i anir Dr. Sanjib Rawat, Dr Neelamjyngbha Sun, Dr Aspari Azeez, Dr Rajni Thabab, Dr Priyanka Dev, Dr Avinab Dey, aser Dr Dhayanithy M. nungeri takok ngua inyakago. Parnok den perfusionists Mrinal Mandal aser Loosar Dkhar nati yaritep.

NEIGRIHMS Director Prof. (Dr.) Nalin Mehta aser Medical Superintendent Sr. Prof. A. Mishra natia Ozaki procedure inyakba telok nem tenüingsang agütsüba metetdaksüogo.

MULUNG NEN O**25.05.1946 ~ 28.05.2025**

Onoki teti meima aliba Ojala, asür **Martula Aier** (Longjang) shirangba anogo nungi tenzuka tasünü tashi kija-kibongtem, lokti balala, anükapang, adianutem aser tembartem shirnokisa ozü kibong den sarasadem, nübo, rongsen aser shisatsü agi bendanga yaria aruogo, nenok ajak dang kanga pelaba lemsateper.

Takoksang Tsüngremi nenok taküm aser wadang nung tali moajangma ta ozü tamang sarasadem.

~ Temeim Chirnur, Semchir & Anükapang.

Anti-dam activist Ebo Mili lendong nungi jenbuogo**Itanagar, June 1, 2025**

(Agencies): Boleng District Magistrate-i pa anema ken o benokba agi human rights defender, anti-mega dam activist Ebo Mili-i Arunachal Pradesh kübok Parong yimtsüng toksür aotsüsa aküm.

Mili ya taoba Hombar nungi samaogo ta bushitepa aru saka Hokolbarnü pa lendong nungi jenbua lir ta osang metetdaksü.

12,000 MW Siang Upper Multipurpose Project atema Upper Siang aser Siang districts nung sepaitem mapa lemzüksüba sülen tensa mejungi küma lir.

Mili-i Parong yimtsüng toksür Shi-Yomi-i aodang Tato tesem nung anentsüh ka alua aliba ajuru aser iba jagi pa GREF camp ka nung jenoktsüsa aküm ta ashi.

Tesüiba nung police-i pa indang mobile phone tsüingsü bushiba agi pai pa indang phone switched off asü ta Mili-isa ashi.

Iba sülen apusoa aodang tesem

aika nung lenmang shibanger aliba ajuru aser network coverage aliba tesem atongdangbo pa samaba osang prokshiadoker liasü ta Mili-isa ashi.

Pa den külem activist Bhanu Tatak aser yimdaklirtemi Deputy Commissioner rongshiba agi police-i pa mapu aser iba atema parnok dang pelar ta Mili-isa metetdaksü. Paisa Arunachal nung sensotem aser talisa Adi nungeri pa pusema nungitba atema pelaba shisem.

May 22 nü Mili-i nisung 80-90 shi anir Beging lungkak aitdak adenshi ta DC PN Thungon-i taoba Hombar Mili anema ken o ka benoka liasü.

Beging nung tzünokdang atema drilling machines aser tanga osettem yua lir. Ajisüaka Beging nungeri Mili anema ken o benokbaji magizüker aser pa SIFF legal counsel ka ama dang shilem agi aser ozüing alema kecha meinyak ta parnoki ashir.

NGT-i Assam commando battalion camp ken o anener**Guwahati, June 1, 2025**

(Agencies): Hailakandi district nung aliba reserve forest land ka nung Assam police commando battalion camp ka yangluba ken o National Green Tribunal (NGT)-i anenogo.

Centre sorkari iba tesep amenoktsü atema forest approval agüjadoker liasü aser iba anema onük kecha mali anungji iba ken o angadanga aotsü nüngdak madoker ta NGT-i ashi.

Assam sorkari 20,000 square meters dak alia inyakba maparen ajak agientsü nangzükogo aser iba ya environmental clearance atema telatet lir ta NGT-isa ashi.

FC (Forest Conservation) Act, 1980 nung Section 2 kübok clearance agüja aliba ya Assam Police Housing Corporation Limited pusema agütsüba lir aser iba anema ken o kecha mali ta NGT-i metetdaksü.

Taoba nung Assam sorkari State Environment Impact Assessment Authority (SEIAA) dang iba camp atema environmental clearance menügdaker kechiyong iba ya 20,000 sq m telongtet nung dang lir ta shia liasü.

SEIAA-i mezüingbo iba mapatong ya "educational institute" ka ta züingok aser iba ya environment ministry notification nung ajemdaker inyakba liasü. Ajisüaka, Supreme Court-i taküm February ita iba notification sota ayu.

Supreme Court-i oshidang agütsüba nung ajemdaker NGT-i SEIAA, Assam dang iba mapatong ya "educational institute" ka asü masü asadangsü tetuyuba agütsü.

Assam battalion camp atema forest land nungi hectares 44 agiba indang osang ka angazükba sülen Justice Prakash Shrivastava, Sudhir

Agarwal, aser A. Senthil Vel nunger adenba NGT principal bench ajanga ken o ka benoka liasü.

Assam sorkari Centre dang camp yanglutsü atema forest land nungi hectares 11.5 tashi non-forestry use atema temelaba meshi aser February ita post-facto approval agütsü.

Ajisüaka, Assam sorkari application magütsüdang Environment Ministry-i NGT dang camp ji Van Sanrakshan Evam Samvardhan Adhiniyam, 2023 (formerly the Forest Conservation Act, 1980) alema yanglur ta shia liasü.

Taoba PCCF (now special chief secretary) MK Yadava-i Forest (Conservation) Act, 1980 nung Sections 3A aser 3B anema commando battalion amenoktsü atema ozüing alema forest clearing agütsü ta osang adokba sülen NGT-i iba ken o benoka angadanga aru.

Polish tir election nung Karol Nawrocki-i takok angu



Warsaw, Aami/June 02 (Agencies): Poland tir election nung nationalist Karol Nawrocki-i takok nguogo, ta National Electoral Commission ajanga sangdong.

Votes ajunga azüngba sülen opposition-i yariba conservative Nawrocki-i votes shilem 50.89 ngutetogo aser liberal Warsaw Mayor Rafal Trzaskowski-i shilem 49.11 angu, ta commission ajanga ashi.

Iba election osang yagi European Union linük ung centrist sorkar yimsüsüba benjatsü, kechiaser Nawrocki-i presidential veto amshia Ato Kilonser Donald Tusk indang temelenshi sentong tem nokdangtsü nangzüka lir, koba Europe aser United States nung right-wing forces temi pela agizüktsü.

Arishi küm 42 tain Nawrocki ya historian aser amateur boxer ka lir, shibai national remembrance institute

ka lapoka lir aser Poles nunger asoshi rongsenketzüng aser social policies tajung agütsütsü nangzüka nübuyima liasü.

Deobar nikongdang exit poll sangdongba nung Trzaskowski-i akoktsü ama liasü, saka ghonda ana shi lir melenshia akum.

Nawrocki-i Andrzej Duda melentsü, shiba pa ama nationalist conservative Law & Justice (PiS) den sendaktepa liasü, aser pa indang kümsük tanabuba August 6 nung tembanger.

2015-23 kümsük nung PiS ajanga benokba judicial system melenshitsü coalition sorkari merangba Duda-i soita liasü, koba ajanga Poland ya EU den rule of law mechi rara adoka liasü.

Tusk yagi election mapang nangzükbba tem meinyakteti arua liasü, aser item rongnung abortion asoshi temelenshi aser LGBTQ temeden tajungba kumdaktsütsü densema lir.

Item nangzükbba mapa kuma meinyaktetba ajanga Tusk-i 2027 küm tatemlen parliamentary election agitsü aliba tonga meinyaktettsü amai ajiteter.

Nawrocki-i takok anguba ya US nung "Make America Great Again" (MAGA) movement nungia teyari tulu lir.

Tir Donald Trump-i EU nung tashi ulushiba anemer Polish nunger pelashishia agizük aser Nawrocki bhukumtsü asoshi taoba hopta Homeland Security Secretary Kristi Noem ya Poland-i ao.

Poland nung US sepai 10,000 shi lir, aser Nawrocki tir akumba ajanga mitkar tesendaktep tali akangshitsü ta Neom ajanga ashir.

Nawrocki ya Ukraine asoshi tangatetba tsütsü Trump den mesüktepa lir. Par linüki Ukraine yaritsü nangzüka lir, saka Tir Volodymyr Zelenskyy yagi allies temi teyari agütsüba nung tajangzük agir ta aitsür.

Iran-i nuclear sensaksem nung tenokdangba agintsütsü akhang

Tehran, Aami/June 2 (Agencies): Tehran indang nuclear programme dak sendakba nung tangatettep tasen ka dangi arudisüra United States-i tenokdangba agütsür aliba koda agintsütsü iba indang osang tejangja Iran-i aginer.

US-i onük kar benokba sülen anogo ishika lir Ministry of Foreign Affairs otongdar Esmail Baghaei-i iba olen ya Hombarnü lemsatepa liasü. Osang ajanga ashiba agi, Iran-i iba maongka agütsüba ya "non-starter" ka ama züngshir aser magizüktsü renema lir.

Nuclear programme dak sendakba nung linük ana hopta tenet sensaksemogo. US-i yimjung aginer aser kasa mapang nung Iran-a tenokdangba balala agütsür aliba nungi jenbotsü imla atadar.

Ajisüaka Tehran-i tang Washington dang parnoki agütsüba maongka indang osang tejangja khangdar, koba linük lenir Ayatollah Ali Khamenei-i taküm küm tetenzüklen

temulung meleme bilemba lemsatepba lephiba ka lir.

IRNA news agency-i ashiba agi, Baghaei-i tenokdangba agütsür aliba shitakba tembangdaktsütsü atema tenangzükba ka agütsütsü nüngdakba lemsatepogo, kong item tenokdangbatem ya kodaser koma agintsü iba indang osang tejangja densema lir.

"Iba dak sendakba nung America nungeri osang tejangja agüja mali," ta pai ashi.

US envoy Steve Witkoff-i ashiba agi, tir Donald Trump-i, Tehran-i uranium maneni enrich asüba anemer aser iba ya "red line" ka ta ajar.

Miima prokshiba United Nations osang ka ajanga Iran-i uranium ya shilem 60 tashi enrich asüba sayuogo, koba atomic weapons atema shilem 90 shi agi matong saka power production atema shilem 4 dak tema lir.

Baghaei-i iba osang ya shitak masü ta ashiba den Iran

tejangraba anema inyaktsü atema UN nongshitsü asoshi anüolen aliba linüktem iba jenjang agiba aija liasü.

New York Times sangdong ka ajanga ashiba agi, US-i benokba onüktem rongnung enrichment ajak anentsü Iran ayongzükba densema lir.

US-i onük balala benokba agizükba Iran-i jangjatsüogo, koba White House-i ashiba agi Iran ajangzüktsü atema lir.

"Osang ka agizükba tetezü agizüker ta masü mesüra aji agizüktsü akoktsü ta masü," ta Baghaei-i ashi.

Iran nunger diplomat kati ashiba agi, US-i benokba onüktem anema telangzüba ka agütsütsü asoshi Tehran renemdar, ta Reuters news agency sangdong ka ajanga metetdaktsü.

Iran nuclear programme dak sendakba nung tenangzüktepba tasen ka yanglutsü atema April 12 nü nungi tang tashi nung Iran aser US na ponguben sensaksemogo.

Israel-i Gaza nung tepsetba nisung 54,740 jungogo

Gaza City, Aami/June 02 (Agencies): Tesüiba ghonda 24 tsüngta Gaza tesem balala nung Israel-i amakdang Palestine nunger nisung tajemba agi 51 tepset aser 503 yiru, ta yangji aliba Health Ministry ajanga ashir.

Israel-i taoba mapang amakdang tepsetba nisung ka tasü mang ki o jen raksar alidak nungi ngutet, ta ministry sangdong ka ajanga ashi.

Israel-i Gaza nung October 7, 2023 nungi tenzüka rarayonga arudang nisung tepsetba 54,470 jungogo aser yiruba nisung 124,693 alitsü ta ashi.

Taküm March ita ceasefire raksaba sülen Israel-i Palestine nunger 4,201 tepsetogo aser 12,652 yirutsüogo.

Yashi, Deobarnü nisung 35 tepsetba sülen May 27 nungi tenzüka teyari bushir tepsetba 75 jungogo, ta ministry ajanga ashi. Teyari bushirtem yiruba 400 dak tema jungogo, ta ashi.

Israel-i Gaza nung teyari agütsüba tesem ana nung chiyongtsü ataa alir Palestine nunger 32 tepset aser 200 dak tema yirutsü.

Gaza south tsütsü Rafah nung Deobarnep civilian meyirijang aika chiyongtsü alemdak adenshia lia Israel indang tanks temi injang khalokja nisung 31 tepset, ta Gaza indang Government Media Office ajanga ashi.

Mapang tatsüka lir ano Gaza City nung Netzarim Corridor soutsü tsütsü iba mesük distribution point ka nung nisung ka khaset, ta parnoki Telegram sangdong ka nung ashi.

Teyari oset balala ya Gaza Humanitarian Foundation (GHF) ajanga lema agütsür,

aser iba mangatettep aliba telok ya Israel aser United States ajanga yarir, aser Gaza nung mezü ng hopta rongrong kanga tesashi adoka tembanga liasü.

GHF executive director, US veteran Jake Woods ya chiyongtsü alem metenzükdang mapa nungi anen aser "humanitarian principles of humanity, neutrality, impartiality, and independence" sülen anidaka iba sentong mapa kuma inyaktsü tamakoktsü, ta shia liasü.

United Nations aser danga aid groups temi GHF den amalitep akatsü memulung aser parnok ya indang-indanger masü aser Israel-i Gaza tesem ajunga agitsü nükjidong aliba ataloktsü asoshi tentet ta ashir.

"Teyari oset agütsüba ya tasütsü sang (trap) ama kumogo," ta UN agency for Palestinian refugees tekolakba Philippe Lazzarini-i Deobarnü sangdong ka nung ashi.

Israel mitkari sangdong ka nung parnoki chiyongtsü aser teyari oset balala alimdak mesüra anasa civilian tem dak injang khalokja mali aser item osang ya tiazü lir ta ashi.

GHF-ia Palestine nunger chiyongtsü meshitsü adenshiba mapang Israel sepaitemi "warning shots" khaloktsü, ta The Associated Press news agency dang ashi aser nisung tepsetba osang ya khenyongi tiazü ta ashir.

Ajisüaka arishi küm 40 tain Ibrahim Abu Saoud-ibo Rafah nung nüburtem distribution point tsütsüi aodang Israel sepaitemi injang khaloktsü, ta AP dang ashi.

Nisung aika injang agi yiruba nguogo aser lanur ka yangji asü, ta Abu Saoud-i ashi.

Russia-i Zaporizhzhia aser Kharkiv amak; nisung 5 tepset

Kyiv, Aami/June 2 (Agencies): Russia-i Hombar anepdang Ukraine southeast nung Zaporizhzhia yimti amakba sülen nisung pongu tepset aser northeast len Sumy tesem drone amshia amakba sülen nisung trok yirutsüogo, kong tanur ana densema liasü, ta regional ketdangsurtemi ashi.

Linük ana tsüngda yimjung asoshi Istanbul nung senkasemba mapang Russia-i item tesemtem makogo.

Ivan Fedorov-i Telegram messaging app ajanga ashiba agi, Zaporizhzhia anütoklen Ternuvate yimtsüng aiben amakba sülen tetsür asem asü aser iba den dokan ka aser ki aika kanga mejungi raksaja liasü.

Ano iba anasa aliba district ka nung nisung ka Russia-i guided aerial bomb ka amshia amakba sülen asü, ta Fedorov-i ashi. Ajak senteper nisung teku

yiru aser nija ki ka kanga mejungi raksaja liasü.

Kasa mapang nung Russia nunger sepaitemi drone amshia Sumy kübok Oleh Sinehubov tesem amakba mapang yirurtem rongnung tanur ana densema liasü.

"Yirurtem rongnung arishi küm 7 teain teburchanu ka densema liasü," ta Sinehubov-i ashi. Paisa, iba tesem nung ano ki aika raksaogo, ta shisem.

Russia-i küm asem tejakdang tenzükbba rara ya tembangtsü atema Russia o Ukraine na yimjung atema indang indang sensaksem tenzüker Hombarnü Istanbul nung tanabenbuba sensaksemtsü lia Russia-i item tesemtem makogo.

Yimjung atema sensaksemtsü lia Ukraine-ia hopta tatemi Russia kübok tesem balala maka teraksatsüba tulu adokdaktsüogo.

Maxwell ODI asaya nungi anisüngzüker



Aami/June 2, 2025 (Agencies): Australia nunger all-rounder Glenn Maxwell, taruba küm T20 World Cup nung rangloker asayatsü atema one-day internationals asaya nungi anenogo.

Arishi küm 36 tain asayar shibai 2012 küm mezüng asayaba sülen ODI 149 nung asayaogo, pai 2015 aser 2023 küm ODI World Cup kokogo aser iba den 2021 küma T20 Word Cup kokogo.

Pai ODI nung run timtiba yanglubaji 2023 World Cup nung Afghanistan den asayaba mapang run 201 yangluba ya lir, koba ODI innings ajak dang tajungtiba ka asütsü.

Iba asaya nung pa Australia pur asayar 7 out sür run 91 yanglur aliba mapang batting ameni ai. Pa temang nunga

timtem liasü saka pai ball 128 nung run 201 yanglua par team takok dangi ania semi-final tonga liasü.

Maxwell-isa 2023 küm World Cup puti otsü nung century takaratiba yanglua liasü. Pai Netherlands den asayaba mapang ball 40 nung nung century yanglu aser iba sülen Australia-i final nung host India koka liasü.

Pa ODI nung tatemsa March ita Champions Trophy nung asayaogo. Iba mapang Maxwell-i pa fitness ajanga pai team atsüzüker ama bilemba lemsatapa liasü.

Pai Final Word podcast dang ashiba agi, iba mapang pai Australia selector tekolakba George Bailey den 2027 World Cup atema jembia liasü. "Ni masayatetsü ama bilemer aser

kü melen asayatsüpurtemi parnok jenjang yanglushitsüla," ta pai Bailey dang ashi.

Maxwell dang 'The Big Show' ta ajar aser pai ODI nung run 3,990 yangluba sülen asaya nungi anener. Pa indang average 33.81 lir aser pai century pezü aser half-century 23 yangluogo.

Pa ya ODI nung ODI strike rate (126.70) tajungtiba aliba asayartem rongnung tanabuba lir aser pai wicket-a 77 agiogo.

Cricket Australia's chief executive Todd Greenberg-i, "ODI puti otsü nung Glenn indang career ya ajak dang jangratatempa ka liasü aser iba atema pa nem tenüngsang agütsür," ta ashi.

"Glenn indang ballistic batting ajanga cricket asaya sangwadaktsüogo aser Australia-i 50-over asaya nung maneni takok ngua aoba nung teyari agütsüogo, kong 2023 World Cup akokba nung pai tongtibang shilem agiba densema lir," ta paisa ashi.

Maxwell tatemsa April ita Punjab Kings nungi asayaogo saka pa teka yiruba ajanga IPL nung tanungba asayatem nung masayatetsüsa aküm.

Pa T20 internationals 116 nung asayaogo aser 2026 T20 World Cup nung asayatsü timla lir, koba India aser Sri Lanka na nung February 8 nungi March 8 tashi asayatsü lir.

Women's Cricket World Cup 2025 mapanglem, venue sangdongogo

Aami/June 2, 2025 (Agencies): ICC-i, taruba ICC Women's Cricket World Cup 2025 atema mapanglem aser asayatsüba tesemtem sangdongogo.

13buba 50-over asayamung ya September 30 nungi November 2 nü tashi asayatsü aser asayamung ya India aser Sri Lanka na nung tesem pongu nung asayatsü.

Stadium tem rongnung M. Chinnaswamy Stadium (Bengaluru), ACA Stadium (Guwahati), Holkar Stadium (Indore), ACA-VDCA Stadium (Visakhapatnam), aser R. Premadasa Stadium (Colombo) densema lir.

Iba asayamung ya September 30 nü Bengaluru nung India team asaya-a tenzüksü, Küm 12 sülen tang mezüngbuba India nung tetsür World Cup asayatsü lir.

Mezüngbuba semi-final asaya October 29 nü Guwahati

mesüra Colombo nung asayatsü aser iba sülen tanabuba semi-final asaya October 30 nü Bengaluru nung asayatsü.

Final ya November 2, Deobarnü Bengaluru mesüra Colombo nung asayatsü aser iba ajanga finalists anaprongla nem renemshitsü asoshi anogo ana bosa agütsütsü.

Taküm iba asayamung nung India, Australia, England, South Africa, New Zealand, Sri Lanka, Bangladesh, aser Pakistan ta team ti asayatsü.

Australia defending champions ama iba asayamung nung asayatsü. 2022 küm New Zealand nung final asayaba mapang parnok England koka liasü. Team ajak rongnung Australia team-i World Cup timbaben koka lir. Parnoki iba asayamung tenetben koka lir.

Kasa mapang nung Colombo nung R. Premadasa Stadium nung Pakistan team indang asaya ajak asayatsü.

Heinrich Klaasen international cricket asaya nungi anener



Aami/June 2, 2025 (Agencies): South Africa nunger batter Heinrich Klaasen-i Hombarnü sangdong ka ajanga pa international cricket nung format ajak nungi anenba sangdongogo.

Klaasen shiba tawa IPL 2025 season nung Sunrisers Hyderabad nungi asaya liasü, pai Instagram nung, "iba ya tejashitsü anogo ka, kechiyong ni international cricket asaya nungi anentsü atema telemtetba agiogo. Ni aser ozü kibong asoshi tarutsü atema kechi tajungba aji lemtetsü atema mapang talang ka agiogo. Iba telemtetba agitsü ya temela masü saka iba telemtetba agiba atema ni pelar," ta ashi.

Australia nunger all-rounder Glenn Maxwell-i pa ODI asaya nungi anenba sangdongba sülen Klaasen-ia iba telemtetba agiba sangdonga liasü.

"Mezüngbuba anogo nungi linük tenüng nung asayatsüji maongka tulu liasü aser aji kü nükjidong aser iba atema ni

tanur asüandang nungi kanga meranga inyaka aruogo," ta arishi küm 33 tain Klaasen-i ashi.

Wicketkeeper-batter ya South Africa team nungi format asemprongla nung asaya 102 nung asayaogo. Pa Test 4, ODI 60 aser T20I 60 nung asayaogo. Pai international asaya nung century pezü yanglu aser century pezüprongla ya ODI nung yanglua liasü. 2018 küm mezüngbuba asayaba sülen Klaasen-i ajak senteper run 3145 yangluogo.

Klaasen indang strike rate 117.14 ya ODI nung run 2000 yangluba asayartem rongnung strike rate tajungtiba rongnung tanabuba lir, koba Maxwell (126.70) sülen asütsü.

ODI asaya nung No. 5buba nung amenba batter tem rongnung Klaasen-i asaya ka nung run timba yanglur lir. Pai 2023 küm Australia den asayaba mapang out mesüi ball 83 nung run 174 yanglua liasü. Iba asaya nung pai six 13 aser four 13 züka liasü.

French Open: Gauff aser Andreeva na quarter-finals-i iogo



Aami/June 2, 2025 (Agencies): World number two Coco Gauff, mezüngbuba French Open kija asaya akoktsü atema meranga asayadar aser lai Hombarnü straight-sets nung takok ngua quarter-finals tongtetogo.

America tsürla yagi Russia tsür Ekaterina Alexandrova 6-0 7-5 agi koka liasü.

Tena tsüngda mezüngbuba set bo minute 29 dang asaya aser iba mapang mezüngbuba asaya pongu nung Gauff-i point pongu dang mongutet.

2022 küm French Open runner-up Gauff ya taküm agi küm pongububa atonga Roland Garros nung quarter-finals tongogo.

La quarter nung Australian Open champion Madison Keys

aser Hailey Baptiste na asayaba sülen tena rongnung ka den asayatsü.

Kasa mapang nung Russia tsür Mirra Andreeva-ia Hombarnü asaya straight sets nung koka quarterfinal tongtetogo.

Sixth seed asayar yagi Australia tsür 17th seed Daria Kasatkina 6-3 7-5 agi kokogo aser la America tsür third seed asayar Jessica Pegula meüsa French wildcard Lois Boisson na ka den asayatsü.

Alexandrova den asayaba mapang Gauff-i mezüng nungi asaya amokbanger asaya aser mezüngbuba set ayong ayonga koka liasü.

Tanabuba set nung Gauff-i mezüng serve break asü aser la 4-3 agi tejakdang aküm.

Ajisüaka Alexandrova shiba tang mezüngbuba Paris nung round pezübuba nung asaya liasü lai kanga meranga asaya saka tatem nung Gauff nem 7-5 agi asaya kokdaksü.

Taküm iba asayamung nung Gauff-i asaya pezübuba atonga straight-set nung asaya kokogo.

Kasa mapang nung arishi küm 18 tain Mirra Andreeva shibai taoba küm French Open semi-finals tonga asaya liasü, la ya Martina Hingis sülen küm anabuba atonga tetsür kija asaya quarter-finals tonga asayartem rongnung tanutsütila kümogo.

Andreeva-i mezüngbuba set bo ayong ayonga akok, saka tanabuba set nung lai asaya 5-3 agi mekoki aliba nungi meyipa tur asaya 7-5 agi koka liasü.

BILEMDANGANG

"Tangatetep agi lokti ka tejakdangi anir."